

梁溪先生文集

十四

梁谿先生文集

文
九三之九四

梁谿先生文集卷第

十二

表劄奏議

乞輪差將兵赴帥司駐劄奏狀

奏陳生擒偽齊賊衆劄子

獎諭賑濟詔書

謝獎諭表

乞宮觀奏狀

再乞宮觀奏狀

不允宮觀詔書

同運司乞兵捕虔賊奏狀

乞泐淮漢修築城壘劄子

乞納級計功推賞劄子

乞用瓦木蓋置營房劄子

乞輪差將兵赴帥司駐劄奏狀

契勘洪州未經兵火以前係本路馬步軍都總管司
畫奉 聖旨虔州所屯東南第六將兵每上下半年
分輪一半赴洪州駐劄後來洪州經兵火殘破建炎
四年內罷帥隸屬江州路安撫司并撥虔州隸屬鄂
州係湖北路虔州緣此申請續降指揮令洪州將東
南第六將起到人兵盡數掃歸元來去處至紹興元



年為洪州復置帥司係安撫制置大使蒙 朝廷差兵二萬人其虔州却撥隸本路緣已有上件軍馬帥司不曾陳乞依舊勾抽一半將兵前來更戍今來虔州不知有前項因依習成年例稱有盜賊占吝將兵不肯發遣洪州雖係帥司其元差兵二萬人節次撥隸他將祇有統制官申世景計千餘人委是緩急使喚不足難以分布防秋及彈壓一路伏望 聖慈詳酌特降 睿旨許依元降指揮將本路所管將兵上半年輪差一半洪州駐劄仍令虔州依舊例逐旋

三二八

二

末

椿辦錢糧前來支給庶幾緩急不致依前占吝有誤
國事

奏陳生擒偽齊賊衆劄子

臣竊見近日諸將獲捷其捷報內並稱生擒偽齊賊衆多者以萬數少者亦不下數千人除願充軍外餘皆給據放散所獲糧斛多者十餘萬石少者亦不下數萬除給散外盡皆焚毀契勘諸路招捕盜賊即有給據放散歸業之理今來偽齊賊黨雖元係 朝廷赤子緣州縣未盡收復其給據之人寔無所歸若令

依舊歸僞齊州縣將來不免又被驅脅從軍死於鋒
刃誠可矜憫今江淮間曠土甚多見措置營田全少
人夫可以耕作臣愚伏望特降 睿旨行下諸將今
後生擒到僞齊賊衆除揀選願充軍外餘人並管押
赴江淮荆湖逐路帥司令措置分俵充營田使喫寔
爲利便其所獲糧斛亦乞指揮務令愛惜或可保守
或可般運或可給散隨宜措置勿令焚毀以爲將來
大兵就糧之資寔爲得策伏望 聖慈特賜詳察

獎諭賑濟詔書

勅李某省所奏賑濟飢民招還流亡事具悉朕臨朝
願治當寧與嗟念百姓之多艱恐一夫之失所而去
歲亢旱遍及江湖誦雲漢之詩而不敢康致桑林之
禱而不敢怠申飭使者分拯黎元移粟他州備修荒
政究茲惠術責在帥臣惟予廊廟舊弼之賢能體
國家勤恤之意撫綏罷病安輯流亡方略敷施功效
顯著推霖雨之餘潤活一路之生靈眷言忠勤寔副
倚賴爲之嘉歎至于再三故茲獎諭想宜知悉

謝獎諭表

臣某言伏奉 詔書以臣賑濟飢民招還流亡特加
獎諭臣已望 闕謝 恩祇受訖者宣化承流本藩
方之職守念功揚善乃 國家之憲章拜賜非宜以
榮為愧中謝竊以天地之盈虛有常數堯湯之水旱
無飢民惟人事之允修宜天災之靡害爰自兵火擾
攘之後初無倉廩積粟之儲歲一不登野有飢殍賴
宸衷之軫慮庶黎庶之咸寧惟 上聖博施之仁眾
宜協力活一路生靈之命臣獨何功濫膺華袞之褒
益重素餐之責此蓋伏遇 皇帝陛下法天覆燾如
日照臨周知臣下之勤勞寸長必錄曲示 朝廷之
體兒細札屢頒致茲辱陟之資亦冒便蕃之寵病牛
卧墮嗟筋力之易疲倦鳥思林期樊籠之可脫已上
投閑之請願施從欲之恩誓畢此生仰酬洪造

乞宮觀奏狀

右某伏奉 詔書以臣近具狀奏聞乞罷帥臣之任
除一在外宮觀不允所乞仰荷 聖恩第深感涕伏
念臣孤陋無取叨冒已多久居患難之中但有退休
之志誤承 恩獎起帥大藩 詔旨屢頒不容遜避

黽勉就職倏忽踰年雖殫夙夜之勤曾蔑涓埃之補
素餐之責啓處不遑兼臣多病早衰心力凋耗憂思
健忘拜跪艱難近日以來頻在假故深恐妨廢職事
有辜 朝廷委寄之意屢丐閑散實以愚誠控告
君父非敢備禮况今 車駕巡幸建康江西一路號
爲上流重鎮在吳則周瑜魯肅之所屯守在晉則溫
嶠陶侃之所鎮臨宜得精力克壯之臣付以禦侮折
衝之任如臣不材衰病豈可冒居伏望 聖慈矜憐
舊物曲賜保全特降 睿旨依臣所乞除在外宮觀
差遣任便居住庶幾晚節末路猶有可言 天地大
恩螻蟻難報干冒 宸聰伏俟斧鉞之戮臣無任祈
懇激切之至

再乞宮觀奏狀

右臣近具奏聞以臣衰病日加心力不逮深慮有誤
朝廷委任乞罷帥守除一在外宮觀未奉回降指揮
竊見都進奏院報左司諫陳公輔乞去以靖康間士
庶伏 闕爲人誣其鼓倡至今猶未辨白爲言伏念
臣當時遭謗尤甚雖嘗蒙 淵聖皇帝特降 詔書

宣示四方而仇怨至今以之藉口以積年往事不敢復自辨明至使諫臣援以求去在臣愚分其何敢安伏望 聖慈特降 睿旨檢會臣前奏速賜指揮除臣宮觀差遣置之閑散庶幾保全晚節不致上累國體臣無任惶懼戰越祈懇之至

不允宮觀詔書

勅李某所奏乞除宮觀差遣事具悉惟豫章之故郡實吳會之扞關控制上流鞏固南服以卿輔弼寬吾顧憂撫潢池弄兵之民當饑殍相望之後易彼儉歲

化爲豐年治最彰聞璽書屢下方倚蕃宣之重共圖社稷之安乃抗封章懇祈避諱且伏 闕之往事皆不根之浮辭排邪議以用卿斷由朕志守夙心而自信無恤人言勿復有云往安厥位所請宜不允故茲詔示想宜知悉春暖卿比平安好遣書指不多及

同運司乞兵捕虔賊奏狀

據吉州申契勘虔賊謝小鬼尹寶謝凱等結集~~五千~~餘人皆是強悍累次作過徒黨首虔州興國縣前來侵犯本州廬陵太和永豐吉水縣管下虜劫作過於

十二月二十八日衝入永豐縣正月初五日衝入吉水縣殺人放火已遣發封武節統押諸頭項官兵會合掩殺因官兵稀少頭回潰散已再差封武節整齣軍馬向前討捕今月初六日在吉水縣七里逢賊接戰勢力不加潰散內黃從義被虜表吉州都巡傷中封武節未見下落乞差官兵前來應援安撫制置司除已差申世景下將官馬仙帶領所部兵三百人及統領官王彥選揀精銳人兵四百人前去應援捉殺外契勘今來春首正係州縣催納苗米裝發綱運及

人戶耕種之時其度賊謝小鬼等結集兇徒作過侵犯吉州諸縣旁近州縣類皆驚擾有妨官司受納裝綱及百姓耕作安撫制置司雖已遣發人兵前去應援緣祇有申世景一項軍馬一千餘人除遣發外人數不多竊慮賊勢猖獗難以捍禦雖已劄下虔州及東南第六將分差將官人兵前來策應又恐虔州守臣孫佑依前占吝不肯遣發致令賊衆滋蔓筠表吉州素來兇惡之人遞相倣倣作過爲患不細伏望朝廷特降指揮於近便處疾速摘那遣發一項軍馬

三二千人前來權聽安撫制置司節制會合捉殺所
有錢糧乞於本路近便州軍上供錢米內支撥不以
遠近前去討捕仍乞 朝廷劄下虔州守臣不得依
前占各將兵公共協力措置庶幾兇賊早得平殄一
方寧息須至奏 聞者

乞泚淮漢修築城壘劄子

臣伏覩 手詔 車駕將乘茲春律 駐蹕建康此
誠至當甚盛之舉也臣昨奉 詔書條具邊防利害
堂論 駐蹕建康爲措置之宜所當先者然其說謂

三百六

六

三八

王在

淮南有藩籬之固則建康可都宜命諸將移重兵於
江北料理營田葺治城壘則藩籬可成今大將旣已
移屯矣營田旣已施行矣楚泗旣已修築城壘矣惟
是泚淮如廬壽泚漢江如襄鄧等處尚未措畫臣願
陛下降詔劉光世岳飛乘士卒之暇以漸修築如韓
世忠之於楚張俊之於盱眙楊沂中之於泗使名城
堅壘縣亘相望以張國勢以籠敵心又命朝廷選通
知古今臣僚按行淮漢深考古跡要害控扼之地如
濡須塢牛渚圻之類築壘屯兵益務自固使犬羊無

侵突之虞貔虎有蓄銳之利以守則固以戰則勝此今日之上策也夫守戰一道也能固守而後能進戰是守者進之基也譬如奕棊之家凡欲勝人先須自固此言雖小可以諭大今陛下旣已斷自淵衷不貳不疑駐蹕建康以承天意矣伏望聖慈益修戰守之備以建中興之功天下不勝幸甚臣以衰病見正閑散不勝臣子愛君憂國之誠輒復自竭冒昧以聞或有可採亦臣仰報聖恩之萬一也干瀆天聽臣無任惶懼戰越之至

乞納級計功推賞劄子

臣伏見祖宗舊制軍功賞格以首級爲法每獲一級或轉官資或支銀絹是以當時賞功覈實無僞濫之弊自近年以來納級計功之法廢全軍推賞之制行諸將告捷皆以棄頭不斫橫屍滿野推墮崖谷沈溺江湖不可計數爲言遂使有司不得覈實朝廷無所考據一軍千人則千人推賞一軍萬人則萬人計功殫官爵不足以褒寵竭府庫不足以錫賚歲用之廣百倍往時罄百姓之脂膏耗朝廷之根本日

益月增殊無藝極臣未見其可也今者 車駕巡幸
建康將定恢復中原之策則所以懋賞報功使將士
知勸節以制度使國用不匱不可不深爲之慮也臣
愚伏望 聖慈特降 睿旨今後諸將告捷並計級
數不得以棄頭不斫橫屍滿野推墮崖谷沈溺江湖
爲言除保明驗實計級推賞外其有選鋒陷陣彊弩
破敵立到奇功之人雖不獲級別許保奏優異推
恩庶幾實立功效之人有所激勸而 朝廷無濫賞
之費戡亂定功不難致也取 進止

乞用厚木蓋置營房劄子

臣伏見 朝廷以泂江州郡近多災慮有姦細作
過累降指揮嚴行禁戢事理固當如此然臣竊謂軍
馬屯聚去處往往取辦一時祇以芟竹蓆廢之屬蓋
搭房舍以省功力一有遺漏不可救止火力所及官
司屋宇亦遭焚蕪至及萬家或靡有孑遺者如前日
臨安鎮江太平州之類是也今 車駕巡幸建康千
乘萬騎理當建置營房屯駐將士謂宜寬商賈以招
徠材植置官窯以燒變磚瓦下傍近州縣以摘那工

匠選有材者專董其事不數月久即見就緒仍禁止
民間自今不得以茆竹蓋屋已蓋造者漸行修換嚴
保伍巡邏之法謹防虞器具之備以絕回祿之患其
餘州郡有軍馬屯聚去處亦可依此施行庶幾火不
能作人得安堵區區愚慮干冒天聰取進止

洪谿先生文集卷第



梁谿先生文集卷第

表劄奏議

道君太上皇帝升遐慰表

寧德皇后上僊慰表

乞推廣孝思益修軍政劄子

車駕巡幸建康起居表

論建中興之功劄子

論舉直言極諫之士劄子

乞不必遽召將帥劄子

乞差兵會合措置虔寇奏狀

道君太上皇帝升遐慰表

臣某言今月初六日准尚書省劄子正月二十五日

三省樞密院同奉 聖旨何薜奏使廻得大金國右

副元帥書具報 道君太上皇帝以違和豫厭世升

遐禍變非常五情崩潰叩地號天無所迨及凡在臣

庶悉同哀慕臣已率在州官吏於今月初七日舉哀

成服訖者 國家鍾九六之運 鑿輿有沙漠之行

遠厭棄於人寰遂上賓於帝所徒抱遺弓之恨莫聞



憑几之言臣民痛心天地改色臣某誠哀誠痛頓首
頓首伏以 道君太上皇帝聖由天縱道本生知儲
精十閏之間圖治百王之上遜禪倅於堯舜憂勤過
於禹湯適遭醜虜之憑陵因致翠華之播蕩關河萬
里霜露十年朔野馳心猶佇八龍之返使輶通問空
纏九土之悲恭惟 皇帝陛下備極人倫光宗
廟諱崇
聖孝孺慕不忘於宵旰深思欲見於羹墻嘗膽枕戈
夙講奉迎之計問安視膳阻伸致養之誠罹此閔艱
何以堪處伏望為 宗社之大計劃生靈之至情少
抑 聖懷俯從禮制冀昊穹之悔禍乘將士之奮忠
報不共戴天之讎神人所助建中興復古之烈華夏
永寧

寧德皇后上僊慰表

臣某言今月初六日准尚書省劄子正月二十五日
三省樞密院同奉 聖旨何薛奉使迴得大金國右副
元帥書具報 道君太上皇帝久違和豫厭世升遐
寧德皇后亦已上僊禍變非常五情崩潰叩地號天
無所迨及凡在臣庶悉同哀慕臣已率在州官吏於

今月初七日舉哀成服訖者天柱傾而絕地維日華
虧而沈月魄矧陟方於遐域尤軫慕於 聖懷承命
震驚拊心摧殞臣某誠哀誠痛頓首頓首伏以 寧
德皇后體儷宸極德合坤靈 上皇資內助之賢
淵聖嚴母儀之奉徽音流乎海宇懿範著於宮闈遭
國步之艱難從 鑾輿而出狩惟備嘗於險阻致或
爽於興居問寢龍樓莫遂 重之養傳音沙漠空遺
萬國之悲恭惟 皇帝陛下夙蘊孝思永懷慈訓以
富貴崇高而不得盡人子之志以兵威強盛而未能
報敵國之仇忽凶訃之遽聞諒至情之曷處念四海
亂離之未靖膺 兩宮寄託之匪輕嘗膽有為冀刷
憑陵之耻茹荼雖痛願寬哀慕之情用慰在天之靈
是為報親之義

乞推廣孝思益修軍政劄子

臣伏觀 皇帝陛下以奉使何薨回得金國右副元
帥書報 道君太上皇帝久違和豫厭世升遐 寧
德皇后亦已上僊 聖情追慕孝思罔極顏色之戚
哭泣之哀羣臣不忍仰視傳於四方莫不殞涕雖遵

國家舊制以日易月而宮中自行三年之喪雖俯徇
宰執百官之請 降批荅始以軍事方棘不得已而
從之猶施素幄聽政於几筵之側 聖孝隆厚度越
百王簡冊所載未之有也臣聞之禮經曰父母之讎
不與共戴天爲匹夫而能復讎者前史美之況於萬
乘之主乎金人不道以其詐謀陵中國破都城邀
兩宮以北狩而置之漠北苦寒之野飲食衣服醫藥
皆不得如意以至大故此 陛下不共戴天之讎也
訃音之來既不以時又以 朝廷新有武功始遣使

回具報凶問皆其姦計豈誠意哉遣發使人奔問

諱日奉迎 梓宮在人情固不可後然或從或違處
其度內皆未可知臣恐議者又以此爲敵人之重有
害於吾自治自彊之術則在 朝廷不得不先定其
策也自建炎以來爲和議所誤專務退避國勢日蹙
主威日削失天下者大半方幸近年天啓 宸衷悟
和議退避之非爲治具進討之計天聲漸振虜僞震
聳將有恢復之期儻或緣此墮其計中小不忍以亂
大謀則爲害有不可勝言者矣昔新城三老說高祖

曰明其為賊敵乃可服高祖聽之二軍縞素為義帝
發哀率諸侯東嚮以誅項籍而漢楚勝敗之勢遂分
今陛下詔屯邊將士不用舊例盡為道君太上
皇帝舉哀其策得矣臣聞將士感憤至有感哭連日
不輟者人心戴宋追思道君太上皇帝因德久
而不忘於此可見臣願陛下順人心承天意益廣
孝恩施之行事枕戈嘗膽修政攘戎以報不天之讎
以刷中國之耻一飲饕一寢興無不以兩宮大故
為念則必有合於天人之願者矣匹夫之孝感動天
地至有魚躍于冰笱生于冬者而況陛下貴為天
子富有四海孝悌之至通于神明聖心感格所欲其
有不從者哉臣以愚直荷道君太上皇帝知遇雖
嘗抵牾終不棄捐奉迎南都恩撫甚渥聞問哀慟
不如無生惟有孤忠願納之陛下故敢罄其狂瞽
不避斧鉞之誅妄有獻陳伏望聖慈不以人廢言
與五六大臣深議而力行之天下不勝幸甚干冒
天聰取進止

車駕巡幸建康起居表

臣某言伏覩都進奏院報 車駕以二月二十七日
進發巡幸建康府者乾旋坤轉共知天意之回雷動
風行頓覺 皇威之暢御六龍以于邁屯萬乘於安
區三靈歡欣四海呼舞中賀竊以江左之形勝莫如
建鄴之雄渾自昔稱帝王之州於今爲東南之會控
引淮海襟帶江湖豈惟民物之阜蕃實乃舟車之輻
湊玉麟神璽晉以中興虎踞龍蟠吳資用武兵戈之
後王氣方隆 皇帝陛下慨國步之多艱憫帝都之
未復因之天險濟以人謀高祖之固關中戰必勝而
攻必取光武之保河內利則伸而鉅則蟠赤縣神州
行遂定都於河洛靈川沃野聊茲臨幸於江山方將
張皇六師震疊中土駕馭貔虎翦屠鯨鯢掃陵寢之
氛埃聳 宗廟之鍾虞恢復故境再臻太平而臣誤
被 宸恩濫當閫寄雖長隄新旆竊慕於葦舟顧重
鎮上流有慙於溫嶠心馳魏闕莫參鴛鷺之行地近
日畿益傾葵藿之志臣無任瞻 天望 聖激切屏
營之至謹遣左朝奉郎充本司幹辦公事韓巴詣
行在所奉表起居以聞臣某誠惶誠懼頓首頓首謹

言

論建中興之功劄子

臣伏觀 車駕以仲春令辰發軔吳門巡幸建康斷
自 宸衷不貳不疑慨然有恢復土宇掃清中原拯
濟烝黎戡定禍亂克譴大慙刷耻復仇之志天下臣
子莫不望風跂竦抃蹈踊躍願少須臾無死以觀中
興之功誠甚盛之舉也臣竊觀自古建功立事扶持
社稷之臣未嘗不以立志爲先申包胥聞伍員有覆
楚之言則曰我必存之其後哭秦庭以乞師卒如其

二百六十五

七

二

八

志張東之語武氏於荆南江中其後卒復唐祚垂祀
三百一夫發念其烈如此而况以聖明之資爲萬乘
之主乎高祖之志見於不肯鬱鬱久居漢中而與韓
信論定三秦之策光武之志見於披輿地圖於信都
城樓上與鄧禹論天下大計此皆志定於前功成於
後初似落落難合而卒能建大功立大名定大業功
施於當年名垂於後世載在典冊不可誣也恭惟
皇帝陛下天錫勇智運屬艱難遵養時晦之久應機
立斷幡然改圖思欲撥亂興衰光復 祖宗之大業

故親總六師以臨江表捨去吳越而幸建康漸為北
伐之計志慮規模可謂宏遠矣臣願 陛下益廣

聖志

今上御名

而充之與神為謀日新其德勿以去冬驟

勝而自怠勿以目前粗定而自安凡可以致中興之
治者無不為凡可以害中興之功者無不去有所規
畫措置必以天下為度必以施於長久可傳於後世
為法則中興不難致矣夫中興之於用兵止是一事
要以修政事信賞刑明是非別邪正招徠人材鼓舞
士氣愛惜民力順導眾心為先數者既備則士奮於

朝農安於野穀粟充盈財用不匱將帥輯睦士卒樂
戰用兵其有不勝者哉方今黠虜雖強不仁不義專
務變詐暴虐以脅制天下神怒人憤莫之與親自古
豈有如此而能以立國者正如隆冬固陰沍寒層冰
千里陽和既回應時消釋此理之必至無足怪也昔
者范蠡說越王勾踐以持盈者與天定傾者與人節
事者與地勾踐用之國以富強然又必以人事與天
時相參然後乃能成功遂以報吳臣竊觀 國家去
歲諸路豐穰今春雨暘調適又將豐歲是在我者得

天時矣正當修人事以應之以我之無覺待彼之有
覺則戡亂定功役不再籍夫何遠之有臣以固陋自
靖康以來與聞國論獨持戰守之策不敢以和議
爲然今十有二年矣孤危寡與屢遭謗誣仰賴聖
聖明曲加照察脫身~~死~~死之濱今得承乏待罪方面
恭聞戎輅臨駐江干將大有爲以成戡定之烈
欣幸之情倍萬常品顧雖衰病尚庶幾未填溝壑間
獲觀陛下恢復中原據憤千古志願畢矣輒罄狂
瞽干冒天威

論舉直言極諫之士劄子

臣伏觀二月六日手詔以太陽有異氛氣四合令
中外侍從之臣遵前後詔書各舉能直言極諫之
士一人將誣以過失次第施行用承天意有以見
陛下克謹天戒思聞讜言銷弭變故以助中興之運
其盛德也臣竊考西漢舉賢良文學之士詳延于庭
如董仲舒公孫洪晁錯之徒不過對策篇指明時
政得失至本朝設賢良方正能直言極諫科始有
進卷及試六論乃對廷策其六論題雜出於經子史

注疏之間所以求卓識洽聞之士號為制科其得人如富弼張方平夏竦皆致宰輔其次如錢易錢明逸孔文仲武仲蘇軾蘇轍兄弟之流皆為名士論議有補於國家然制科之舉貫穿古今汪洋浩渺非強記博識積以歲時未易能究其業所以朝廷近年復置此科未有應令者無足怪也今者陛下以天變之故詔中外侍從之臣遵前後詔書各舉能直言極諫之士臣深慮有司拘以進卷六論牽制舉者難於得人無以仰副陛下咨訪闕失寅畏天戒之意臣愚欲望聖慈特降德音知今來所舉直言極諫之士與免進卷六論祇令對策于廷仍於制策內許其展盡無隱庶幾直言嘉謨得以上聞其進卷六論自以待應科目之士天下不勝幸甚取進止乞不必遠召將帥劄子

臣伏觀陛下駕御將帥恩禮兼隆至有不遠千里召赴行闕者燕射錫賚賜與優渥此誠足以得其心而用其力也將帥荷眷遇之厚爭先望天光而聆玉音竭蹶造朝惟恐居後此亦臣子之至情然臣聞

古之善爲將帥者亦有大事不去屯所文帝欲勞棘
門灞上細柳之軍則親臨之凡以三軍之命係於主
帥機事之來問不容髮使帥不在軍敵人覘而知之
卒有警急何以應敵今將帥旣輕千里而入覲又有
進對燕犒之留連邊境有虞誠不可不慮伏望 聖
慈留神深念自今非有大謀議不必遠召將帥如有
燕賜之恩遣近臣即其軍中可也庶幾將帥得以畢
精盡慮爲陛下敵懷禦侮以圖恢復將來武功告成
中國乂安之後念功賞勞出於曲賜朝夕進見體貌
有加鍾鼓不作則遣使以訪之惟 陛下所幸耳愚
慮所及冒昧以聞死有餘罪惟 陛下裁察取 進
止

乞差兵會合措置虔寇奏狀

契勘虔州管下盜賊多是舊來招安已受官資及已
有差遣不曾起發赴任離去巢穴之人近緣知州孫
佑措置討捕有討捕之意無討捕之術謀虜不密漏
泄事機致令皆懷反側結集復行作過如周十隆張
大開謝凱尹寶謝小鬼等頭項不一多者數千人少

者數百人遞互入人劫掠鄉村殘破縣邑虔州管下如興國雩都虔化瑞金等縣並遭焚毀謝小鬼等近者侵犯吉州界分殘破永豐吉水等縣逼近州城又於太和萬載縣界內盤泊作過本司遣發申世景下將官馬仙統押軍馬前去會合巡尉及吉州將兵追襲斬殺五百餘級殺獲首領蕭破洞賊勢方沮又遣統領官王彥將官王勝各統所部軍馬前去永豐興國縣界會合巡尉討捕張大閑周十隆尹寶李安淨等除近據虔州將官曾綱申殺獲尹寶賊徒不計數目及據統領官王彥申已討蕩永豐縣賊沈三十軍生擒賊首殺獲三百餘人并據吉州申張大閑已就招安見赴州公參及據虔州將官何榮申殺敗周十隆等復奪興國縣追襲至贛縣界殺死賊徒五百餘人又據將官馬仙申殺敗徐聳賊徒生擒徐聳已解吉州根勘本司已具逐項因依申 朝廷外竊緣近來周十隆與謝小鬼尹寶殘黨及自餘賊徒丁二十一謝二十 花張細計明寶丁和尚呂添男謝凱陳八梗廖車頭十等互相合火人數眾多雖累次殺敗

尚未衰息本司已劄下將官馬仙統領官王彥專一
於永豐興國縣措置討捕并近蒙 朝廷差到福建
路統制李貴下軍馬前來會合今月初二日據李貴
申已將帶所部軍馬前來虔吉州界首會合捉殺所
有隨軍老小乞於吉州屯泊本司已劄吉州踏逐官
屋及寺院屯泊并應副錢糧外契勘虔賊累年出沒
作過正如溪洞僜人不復知有王化致令虔州一州
財賦催理不行傍近郡縣皆被其毒為害甚大若
朝廷必欲掃蕩巢穴窮究根株為一勞永逸之計非

壓以重兵且招且捕將招出頭首并桀黠徒黨押赴
軍前使喚使良民漸次歸業未見其可兼虔州南安
軍見有廣南劉宣湖南李才古政譚誠邵宣方正等
賊徒各數千人頭項不一李貴軍馬人數不多未可
全然倚辦竊見湖北京西路宣撫使岳飛下軍將多
在鄂州屯駐見於本路起發錢糧前去應副若乘此
邊境寧息別無探報之時選擇得力統制統領官摘
那數千人前來本路就糧權聽本司節制令與李貴
及本路兵將會合措置不數月間決可平殄將來盜

賊既平之後亦須留李貴軍馬屯泊吉州與本路
兵將相為表裏強壓使殘黨不敢復出嘯聚作過或
有作過之人即時討殺此為得策若目前討捕不遣
重兵只據見在兵將竊緣賊火數多官軍有限勢力
疲乏別無策應難以成功若將來賊平之後不別屯
軍馬但以虔賊付之本路將兵事力單弱必待殘破
州縣屠害生靈一方震擾廼始申告 朝廷遣兵應
援緩不及事為患不細兼虔吉州殘破縣分賊平之
後亦合體究著實蠲放稅租使民戶得以安業除已
遣左朝奉郎本司幹辦公事韓巴詰 朝廷宣議外
伏望 聖慈特降 眷旨令 朝廷詳酌措置施行

梁谿先生文集卷第





